

四庫全書

集部

欽定四庫全書

端明集卷十

宋 蔡襄 撰

制誥

中書試金吾衛大將軍除邊鎮節度使制

門下天下之重惟將相之任必在於得人閭外之專有  
文武之資乃可以屬事眷茲藩屏控夫朔陲開府文書  
董貔貅百萬之衆被邊亭障實耕桑什伍之人求其遠

御之良付以中權之劇厥有成命告于廟朝具官某沈  
勇本於天資練達通於世務有明敏之智臨機而必決  
有方厚之質自信而不疑久歷官聯關總環衛廉行微  
巡之道督刺大衆之居士旅勅馴寇攘衰止嘗以清閒  
之宴與之從容而言亮其忠純授以節制於戲甲兵乃  
刑之大軍旅以禮為先爾其察甘苦而周下情明法令  
而一羣志又綏封畧旌錄勲勞惠愛究於黎元威聲伸  
於大漠副茲委用勿懈乃心可

中書試禮部尚書除御史大夫制

門下朝廷興治之原法制修明為大內有公卿臺寺之  
衆外有牧守方伯之聯察繩其違第次厥課秦漢而下  
專委中司祿秩之崇差貳上宰所付茲重惟才之求具  
官某服先民之言承名家之學文章深厚以華於國行  
實朴茂以充其中歷侍禁嚴益劭風問嚮居都座嘗典  
春官傳經決事而甚明飭躬率下而自正是用獨持朝  
憲彈肅官師夫聲利不誅之謂剛端勁不阿之謂直獻

議每形於鯁亮舉邪勿吐於權豪汝服斯猷往勵而屬  
可

中書試郡國察孝悌力田詔

勅朕念古先聖人極遠慮而垂大法元元之民其生長  
也有教育之地故能興行於家力作於埜親族和同愛  
足以相恤衣食贍給力足以相保然後獄訟衰而盜賊  
息以格於治平嗚呼其盛也哉自戰國歷秦重利而寡  
恩孝悌之風薄矜奢而廣欲惰游之手衆驅人於不善

率由是已豈斯民之性有所偏異蓋導之之具至與不  
至耳朕居士民之上父母之司內竭至誠奉祖宗而惇  
族屬外務朴素却侈用而息煩費思與吾人尚本而棄  
末然而生齒之聚或戾於教義而困於饑饉者其導之  
未至歟今郡國長吏皆朕協力而宣化其有孝悌章明  
勤於田畝可率鄉黨者其以名聞朕將錄之以風天下  
戒勵臣僚奏薦勅

右正言直集賢院同修起居注韓絳奏臣竊見臣僚

奏薦文武官頗或所舉無名所稱不實妄冀朝命以  
為私恩伏恐請託公行重增爵賞之濫此弊不革為  
蠹實深欲望聖慈明降詔書嚴行約束今後中外臣  
僚已係擢任若提點刑獄已上並不得薦舉如有所  
舉無名所稱不實違犯詔旨並仰御史臺察訪事由  
彈奏伏乞重行朝典候勅旨兼近年以來中外臣僚  
奏舉官員內有人品庸常薦章交上亦有宿負罪累  
迹狀醜濫者乞行雪復奉聖旨令降勅戒勵

勅朕制臨天下思與賢材而共治之故開薦舉之路又  
於羣臣無有疑問故所薦舉多亦陞任然比年以來或  
所薦者材資葺薄加之品目下人遠甚然有公卿交牘  
稱道或宿愆醜濫曾非招註請行湔復或職任疏遠不  
稱重輕引援清近迹其本源豈非造請銜鬻者傍依權  
門無廉恥之行交結恩私者苟蔑王爵無公共之志不  
然何以臻此不知不賢而言之茲曰蔽惑知其不可而  
言之茲曰欺罔左右官師懷此事上嗟予何賴誠心未



孚遂致於法朕甚愧焉其令御史臺察訪中外臣僚奏薦如有所舉非其人者立須彈奏必行之罰宜自近重茲伸警尚體予意

廣南轉運使元絳奏南海洪聖廣利王獠賊至廣州城下官吏等屢禱有應乞加崇顯之號奉

聖旨特封昭順王制

皇祐五年

勅易載害盈益謙之旨蓋神道正直必有輔於教也厥有陰相吾民沮遏兇醜應答明白不列美稱曷以揚神

之休南海洪聖廣利王惟王廟食尊爵表于炎區年既  
遠矣唐韓愈記稱神次最貴且有福禍之驗國家秩禮  
祀等尤高康定中朕嘗增王徽名牲幣選數罔不稱是  
今轉運使絳言迺者儂獠狂悖暴集三水中流颶起舟  
留三日逮至城闐廣已守備火攻甚急大風還燄閉門  
渴飲澍雨而足變恠屢見賊懼西邈州人咸曰王其恤  
我者耶朕念顯靈佐順靡德不酬其加王以昭順之號  
神其歆茲顯寵萬有千載永庇南服

廣南東西十一路轉運使提點刑獄揀放配軍

勅

勅朕臨馭海內念憂元元冒以至仁期於遂性比因郊祀赦宥辟刑顧惟羈隸之人特解錮留之負或能悛省不仍舊轍者遷移便地或加瘞老不能自力者去籍遣原列郡守符監州使其悉心按視以稱朕懷

皇姪故左衛屯大將軍信州團練使從質可贈

觀察使追封侯制

朕惟至治之主本於仁愛內澤宗族以化於下矧予是  
弟之子親於屬籍年不克永朕甚悼焉具官某忠恪以  
立朝信厚以行已久更環衛薦歷歲月休有令善著于  
羣聽今其殞逝重以優恤增廉使之秩啟侯社之封飾  
終之恩於斯為厚惟汝之靈歆是嘉寵

司農少卿致仕呂士宗男克禮可將仕郎試祕  
書省校書郎制

以爾父久歷煩使方茲引年命汝以官往試祕省夫仕

宦善歸而嗣子有祿始終之典可謂厚矣汝其勉勵以稱恩寵

前光化軍乾德縣令同監秦州西溪鎮鹽倉徐  
介前湖州觀察推官監台州黃巖鹽監張侗可  
並著作佐郎制

勅國家爵賞之設以待賢才計秩遷官殊非本意然殿  
則有罪而最或不遷又非所以馭吏之法也爾等並緣  
保薦分幹權利校課所當宜在陟典夫先中文詞之科

今列譔述之局其資盛茂爾宜勉之

追官人前朝奉郎成端夫行太常寺奉禮郎制  
勅具官坐墨奪官理宜廢棄屢更歲月或能省循敘還  
京司實為恩渥勉新刷故以務後圖

尚書兵部員外郎直史館知滄州田京可工部  
郎中餘依舊制

勅具官迺者大河之北遭罹水患板戶貧困冗散旁郡  
朕甚愍焉屢勅所部每加矜恤人情懷土而未聞還集

汝京所守濱海都會襟帶之固兵民所聚而能上體予懷下究民隱申慰勞來歸占者衆使者條狀願為褒異文昌草議起部要司命汝踐之用為增秩夫計功實與累日月而遷者固有異矣汝念此意撫安居人可

龍圖閣直學士起居舍人李絢遺表男將仕郎守將作監主簿昶特授太常寺太祝男昶特授將仕郎守將作監主簿制

勅某官某男某等朕念乃父早中科選以文華深厚而

居詞命之職以材智聰明而付浩穰之治方膺外補奄爾淪逝錄其嗣子以伸予懷或遷與禮臺或麗名匠寺並為優寵勉自進修

儒林郎守雅州錄事叅軍兼司法事田九思特授太子中舍致仕將仕郎守真定府平山縣主簿宋象特授守國子監丞致仕制

勅具官爾等久歷州縣願還官政念其退止宜伸恩典或進與官坊或叅名庠序持此以歸示於閭里亦足以



為光榮也

兵部員外郎知制誥胡某可依前兵部員外郎  
充翰林侍讀學士仍舊判銓制

勅朕念君人者左右前後皆正人則諷諭顧問之間莫  
不循於治道故侍從之臣心在精擇而況觀學之職尤  
其重者自非飭躬端慎濟以文業則不與其選也具官  
某勁清有守臨事不回記問該閎屬詞精敏久居禁掖  
日有嘉稱今命爾以金華之要爾其考聖人之言攬前

史之載有以發智慮之明作安危之鑑者附當世之事而為朕論之使授受之際謂之得人豈不美歟

兵部員外郎知制誥何某可依前兵部員外郎  
充龍圖閣直學士知秦州制

勅朕惟關陝之右翼門為重內宿兵師百萬之衆有政令之決外連羌夷千里之遠有綏安之畧必欲恩威行而士伍服信義著而種落附非有文武之資者不可以輕授具官某爾以文雅中詞科以智敏被器使典訓誥

之職而復於深厚歷官守之政而濟之果斷會秦闕帥  
慎擇其人惟汝之能斯可往治輟自禁垣之要增以內  
閣之嚴若夫入叅侍從之聯出委藩翰之寄士林華選  
爾實兼之隴道之雄為天下首講訓綏輯控制外虞使  
朕無西顧之慮者爾其望也勉楸勲績以稱休命

奏舉人前邢州錄事叅軍褚士言奏舉人前潞  
州上黨縣令正王世範並可大理寺丞制

勅具官某等天下郡縣之吏其員以千萬數材之與否

莫可周知惟監司長吏以善狀保薦者則校閱而升  
獎之以勵能者爾等劾官有勞而舉者又以連罪為任  
往丞棘寺並為優陟夙夜思省以答茂恩

追官人李君俞授大理評事制

勅使汝為倉庾之吏而粟不可食奪免一方以戒不職  
今所監之司皆曰向以西事應猝便辦蓋無他腸又所  
輸粟移之秣飼厥數不減屢更郊赦之澤請還京寺之  
僚吾其從之爾當自省

前宿州臨渙縣令郝周授太子中舍致仕制

勅具官某受吾俸祿驅馳州縣至於衰老今其歸也不念其力乎遷與儲坊為爾光寵

未復舊官人內殿崇班李昭素復內殿承制制勅某汝嘗失刑民死非罪奪官既久省咎則多復禁省之舊聯實朝家之優渥勉遵成憲勿蹈前為

如京副使兼閣門通事舍人侯宗亮可特授西上閣門副使制

勅具官某帝者日臨法宮以朝羣臣宴御便坐以講庶  
務臚傳辭令之美贊相規儀之多惟二閣之權允司其  
事予欲擇其能者非敦良敏茂之人莫能勝其任也以  
爾某資性恪毅器質淵通周旋軒陛之間屢更寒暑之  
變宣納夙夜罔有不勤出入禁嚴罔有不慎敘爾績効  
進貳使名朕左右之人所籍者雖衆要近之職得與者  
無幾汝益修勵以稱寵靈

前開封府祥符縣尉趙偕可著作佐郎前趙州

錄事叅軍范孝思可大理寺丞制

勅具官某等郡縣之下勤勞職事歲考滋久而能謹檢  
操履為保任者所知者朕常與進用以勸焉爾等咸有  
吏資著于銓筦條列績閭當於陟典或叅祕丘之選或  
進理寺之名各服寵章益邵來效

故大府卿畢世長男試將作監主簿從益可授  
守將作監主簿制

勅具官某男某以蔭入仕深歷年所進列卿位屢更藩

翰因其淪逝閱其子姓一門之內咸列官簿然恤孤之  
典朕乃不忘唯爾從益頃試匠寺今與即真爾母不勤  
以墜寵命

東頭供奉官薛讓可內殿崇班制

勅具官某向以馳驛邊障將命往還既涉歲月不亦勞  
止升聯殿陞視秩朝闈茲為褒渥之隆用勗官成之効  
往欽爾次無怠厥修

江州彭澤主簿閻旦可守國子監丞致仕制



勅具官某占名中銓逮于暮齒謝還官政退休其家念  
爾知止進丞上庠往服茂恩以安汝志

故廣惠等八州泮海都大捉賊西京左藏庫副  
使武日宣宜特贈忠州刺史制

勅具官某綏懷之德不及蠻獠至使拔其種類寇鈔嶺  
外徑趨清海鋒氣尚銳爾惟邏巡之職實司翦捕而能  
忠果挺志勇毅自奮身先士伍轉戰不已兵力失利歿  
於鬪格遠聞予聽終夕悼惻特推恤典列於刺部忠寃

如在歆此哀寵

故知封州殿中丞曹觀宜特贈太常少卿知康  
州贊善大夫趙師旦宜特贈光祿少卿制

五嶺之表面內以來南連海澨西屬蠻峒未嘗有鳴桴  
之警故守封之臣幸其無事莫為戰備迺者獠衆猖悖  
乘襲疆場爾等並分符竹對典州郡當賊鋒銳亡身徇  
國嗟乎城池不足以為固甲兵不足以為衛陷於非命  
傷惻良甚恤恩之厚並貳卿列汝其有知承朕此意

故乾州安遠會昌縣巡檢禁董玉等宜並特贈  
禮賓使故賀州管界巡檢殿直趙允明等宜並  
特贈南作坊使制

勅具官某國家設警巡之職用以誅磔寇盜撫安人民  
有能死其官者朕嘗旌異追進名爵收錄子孫所以表  
忠義也蠻方猾橫弄兵嶠外爾等咸以忠勇疾憤狂寇  
擊刺襲躡遭罹不幸朕為人父母而使汝等身膏草  
野妻孥望祭萬里之外心焉哀惻其何已耶特寵使名

以慰幽路靈其不泯歆我嘉命

廣南西路鈐轄下捉殺故奉職長用和宜特贈  
內殿承制指使三班差使張亢等宜並特贈內  
殿崇班制

勅具官有生而死磨滅者衆為忠竟蒙烈雖沒不忘汝  
等叅於裨校往捕寇攘矢石之間殞其軀命朕心哀愍  
特優恩恤追榮近墀賁終幽空冀爾靈竟享是嘉寵

故賀州司理叅軍劉冕宜特贈左贊善大夫故

英州攝官李稹宜特贈光祿寺丞制

勅具官某等並為嶺外州縣之吏屬以蠻峒搖蕞毒我  
列郡恃兵跳梁殺辱紳笏汝等並懷忠節捨生不屈朕  
惻然義之特行哀恤追褒宮室榮贈宗司靈其歆之良  
慰汝志

步軍副都指揮使觀察使張茂實可馬軍副都  
指揮使節度觀察留後制

天下之本在於京師而宸極之下必有材勇之士居則

拱扈威陣出則番茂外國分建三帥以治其政茲率故  
典厥惟舊矣今予有百千萬數精銳熊虎之衆曾是強  
毅有能為予訓忠義之節明法令之禁者吾其用之具  
官某有沈敏之才通夫將畧有謹厚之行達于予聞擢  
領萃屯翊侍軒陛惟時蚤夜罔違靖恭遷兩使留務之  
名總萬騎選鋒之勝車田符籍爾則專之噫以嚴一衆  
其術匪難服于衆心其道匪易平直無頗情乃上貢廉  
明不撓惠乃下究委注惟重欽哉惟承

馬軍都虞候王凱可殿前都虞候步軍都虞候  
王達可馬軍都虞候制

勅國家列三帥以治拱扈之師設虞度以貳董齊之政  
非有沈武之資敦信之實者無以條理尺籍嚴威環衛  
朕嘗於是擇而任之具官某用之邊圉敢於戰格而服  
其士伍具官某遣之戍禦奮其材勇而聲在戎漠咸以  
勲績分提禁旅藉其能力尚取疆陲外陪殿陛之崇佐  
護騎屯之次候奄至重倚信彌親爾其下達於衆情上

裨於長政恭勤一志毋懈厥初

韓絳可右正言依舊直集賢院同修起居注赴

諫院供職制

勅具官某百執事各修其政而諫諍之臣得與國論其  
職要其責重故難其人先朝命置六員而終不克備朕  
每擇是官必沈慮久之而後行信乎其人之難得也惟  
爾絳擢在高第屢更器使執心方勁落落自立今易處  
西省往備諫列若夫罷軟而畏權要附阿以希進用儼



計以干譽煩碎以欺俗有一于此茲謂壬人術學通於  
大體言議中於至理弼違箴闕以輔不逮知而必為靡  
悼後患有出於此茲謂正士予期汝絳作予正士可不  
楸哉

前蘄州黃梅縣令兼監稅申房可漳州錄事叅  
軍監京山稅制

勅具官某向治征筦最目有勞督儲曹於外邦商美利  
於劇邑關市之務本以察譏爾屢為之母或苛撓

睦州司理叅軍諸葛寔授試祕書省校書郎知  
真州揚子縣事為捉賊温州永嘉縣尉韓鉞可


萊州即墨縣令制

寔一作寔

縣道之設尉屏兇盜而護善人所以助令興治者也空  
官有罰敕職有賞而勸沮行焉爾等捕除攘奪咸應遷  
格或試祕省分治劇邑有民有社可以為政勉樹平直  
以稱褒典

深州司戶叅軍李德宣守大理評事致仕制

勅具官某士之壯則從王事老而歸則教鄉黨未嘗不  
為善以助治也汝掾于劇郡逮於暮齒願還官政引卧  
丘樊遷丞京司以需朝渥爾之仕與歸亦有助於治歟  
可



端明集卷十

欽定四庫全書

集部

端明集卷十三

詳校官庶吉士<sub>臣</sub>朱理

檢討<sub>臣</sub>何思鈞覆勘

總校官進士<sub>臣</sub>朱鈐

校對官中書<sub>臣</sub>劉圖南

謄錄監生<sub>臣</sub>周元濬

欽定四庫全書

端明集卷十

宋 蔡襄 撰

制誥

知秦州龍圖閣直學士何中立男景先可特授  
將仕郎守將作監丞制

勅具官某男某以爾父輟自禁垣往帥邊服在注倚之  
尤重必寵數以兼優爰露奏封請任其子命丞工監之

列用為侍從之華勉勵清修以永多慶

范仲淹男純粹等四人授守將作監主簿制

勅故資政殿學士戶部尚書范某男純粹等仲淹素竭忠力勤勞王家不克永年奄爾淪逝嗟其材賢不可見已竝錄子姓逮於族親或列名京僚或試秩監省始終之典予唯不忘清白之訓爾宜自勉

范仲淹親外孫賈公直試將作監主簿制

勅某朕以仲淹勤勞王家忠義一節奄爾淪謝悼予予

衷錄其外姻試秩監省勉思所立毋忝異恩

前福州錄事叅軍李守寧特授建州錄事叅軍  
監滑州大翟村酒稅前廣州司法叅軍劉汝翼  
特授漳州錄事叅軍監陳州南頓縣酒稅制

郡督郵之任蓋所以紀綱政治糾司過忒惟強明幹敏  
者乃可為之以汝等嘗歷諸曹復有歲最寵以都掾之  
目洎于征權之局夙夜思勉毋空厥官

開封府推官屯田員外郎王礪可依前官充開

封府判官尚書度支員外郎孫錫可開封推官

制

勅具官某等材不敏明不能決穰劇志不强果不能糾  
豪勢法令不通不能繩姦吏賦役不均不能恤百姓予  
惟京府之職嘗患四者之難故求其人以貳尹政以爾  
礪雅有吏資嘗叅憲職試能滋久慨然餘裕以爾錫麗  
名詞館平覆刑書將厯要塗必更幹任竝佐浩繁之治  
且觀贊助之方服予訓言以竭忠力



太常少卿新差知兗州徐起可光祿卿制

勅具官某趙魏之域為天下重宿兵聚粟以鉅萬計汝  
起歸為使者將漕鄰部輸置金繒以濟須給嘗以陟典  
減從近歲德推朝渥乃正卿秩宰膳之寄尤為嚴近勉  
圖績効以稱嘉寵

知撫州都官外郎李先轉職方員外郎制

勅具官某爵賞之貴以馭于下凡與遷進必校勞實以  
爾嘗歷臺署往涖民政績移歲莞居有功伐在法應陟

予何啻焉郎等唯三乃踐以往膺褒前進益楸動力

三司度支副使兵部員外郎曹永叔充天章閣

待制知福州制

永一作穎

勅朕念善為維持之策者運天下如臂使指欲其大小相臨而威令必達故也東南之郡長樂都會表山環海地險而遠八州生聚繫乎總帥非有幹明之資能辨吾事者不可以遣具官某智力精敏應幾必決薦更罷任籍有聲稱將漕益部還貳計省而猥繁之務罔不給肅

今屬以方面之重寵以延閣之華爾其繕除兵械補完城堞懷綏困窮翦遏兇猾使吾人無愁苦之嘆朝家有專倚之賴朕志惟是爾儀圖之

刑部郎中充天章閣待制知慶州張昇可依前  
刑部郎中充龍圖閣直學士知秦州制

勅侍從之臣雖出撫方面每被美名以為光寵況內閣之重苟非耆儒厚德或材通罷任者不是與也具官某方嚴出於天性識慮成於學術向在臺省有鯁亮之稱

逮臨邊圉有綏靖之略朕念冀門鉅屏羌夷雜處板戶  
繁富軍旅屯萃今升以祕圖之職屬以隴道之事汝久  
涖戎政備體忠力無復多訓尚服休命

尚書都官員外郎郭申錫可侍御史制

勅郭申錫御史府之職正紀綱繩愆繆外以肅官師內  
以獻忠謹名為清要固難其材朕尚令近臣保薦庶乎  
得人知雜御史擇行以爾申錫塞詔擢自郎署之列往  
膺柱史之任汝有鯁正之志精通之議必竭爾慮以達

予聞

太常博士趙琪持授尚書屯田員外郎國子博

士宋詢特授尚書屯田員外郎制

勅具官某國家遇官人者之意甚厚凡三歲則比其殿  
最按其所當而升黜之其間雖無較然治狀之明而能  
廉謹自守者亦不遺也爾等監視州郡或臨縣邑計年  
應法用遷爾秩郎官清列推重於世咸務循勉以稱恩  
渥

縣尉劉宗旦授錄事叅軍監酒制

勅具官某汝尉于縣而能禽誅寇盜謹飭其職攸司考課當乎賞等升郡紀綱往臨權酷自力來績以報甄錄之異也

渭州新寨東頭供奉官韓周授內殿崇班制

勅具官某保鄣之任刺視疆境護防居人幹謹其事逮夫三歲斯亦勞矣遷與禁墀之列通聯朝著之榮虔思茂恩以立來効

內殿承制高允元授供備庫使制

勅具官某祇事內廷素尚忠謹寢延歲筦益著勞能使  
介之名禁墀允重特推渥澤俾進崇班勉敦夙夜之勤  
庶荷褒遷之寵

維州昌邑縣主簿張白授大理寺丞致仕制

勅具官某向從祿仕謹身無咎今謝官政推恩惟厚讞  
刑之秩顯於京曹被榮而歸寵爾衰暮

樞密直學士給事中程戡可依前給事中充端

明殿學士知益州制

朕撫馭寓內恃之久安使上澤周達情不壅者蓋有  
賢能為予鎮守方面爾蜀道天險劍外遼絕每委帥臣  
俾之專決列城側首以承教令今之借威權託腹心者  
無與為此其於選遣豈輕也哉具官某以文中高科以  
材任煩使入居憲臺而豪貴斂迹往臨藩翰而孤嫫蒙  
福回翔禁近號為恭謹獻納謀議關於機宥升榮祕殿  
分寄益部形勝謠俗汝當知之夫以刑制民畏而不戴



寬恤征賦使之便安予爾賴焉爾其勉力

西京左藏庫使沈惟恭可遙郡刺史依舊西京

左藏庫使制

勅具官某刺部之雄在克尤重今雖遙制必勲勤戚舊者然後命之以爾早由武材久處禁職間有疇勞之舉與其滿歲而遷申復朝恩俾司郡契益思勉茂用對寵靈

故石中立親孫祖冲可試監簿制

進祖  
文集

其人惟爾祖中立嚮以文儒參與政柄忠朴淳謹為益  
良厚而其淪逝之日既久爾能纂緝遺篇削藁來上追  
念曩輔惻然不忘京監開榮用顯存沒爾宜脩勵無忝  
茂恩

太常博士王琛可屯田員外郎制

勅具官某爾在邊帥幙府既以材智贊其方略又以經  
營儲粟備辦豐實按格所當宜有遷陟文昌郎位為仕  
清選用醕爾績恩澤甚茂勉務來効以答褒進

樞密院賈德明任承睿可都承旨制

勅具官某等樞宥之府所承稟而宣行者皆禁密之命  
必求謹厚之材乃可備於陪屬以爾等有恪愿之資加  
肅給之敏麗名機務實唯勞舊按其資歷擢總綱領勉  
思勤蓋尚副褒寵

樞密院張繼渥可承旨制

勅某人蚤以材敏屬麗樞庭績延歲月之勞益敦夙夜  
之恪進承旨命特示寵榮祇荷恩遷愈罄誠志

都官員外郎知坊州母湜可侍御史制

勅具官某帝者常欲達聰明于外而與議者重於得人  
士大夫嘗欲獻可否於上而抱材者難於得位朕侍臣  
拱辰言爾湜端方有學可以備憲臺之職擢自郎署典  
于柱史爾以儒進當通理道之要歷更外使固知世務  
之本繩違正失罔戾厥中服命惟虔益楙而志

皇兄故懷州防禦使承幹可贈保靖軍節度使

追封蕭國公制

勅朕嘗覽前史天子之宗族有惇良之行終始顯榮者  
固已稱歎況予弟兄躬是賢德存則接以恩禮歿則伸  
於哀祔所以勵於本支而儀于天下某官某承流慶源  
敏稟善性持信厚之誠而表於屬籍竭忠盡之尚而壯  
于藩翰天年不永奄羅殞逝臨酌傷惻特加愍贈飾以  
齋鉞之重躋夫公哀之列靈其不昧歆是休命

皇姪孫故右屯衛大將軍世崇可贈防禦使追

封侯制

勅帝道尚親所以廣恩而推愛也朕於宗籍惇睦良厚  
其有殞奪每加褒典具官某貴聯天屬躬蹈義訓飾行  
有恭靖之美嚮學有沈敏之善已叅環列入奉禁朝遽  
此云亡予實汝惻進扞防之使紱仍疏啓於侯封塋魂  
有知尚歆榮渥

追官勒停人任達可濟州司馬致仕制

達一作遠

勅某官向臨征筦之局妄加刑罰於人在法所當奪官  
而廢憫其老疾特示寬優方州典午之曹憲臺柱史之

目率為兼命宜體厚恩

崇班閣門祇候李樞可供備庫副使制

勅某官孫衆弗順寇鈔嶠南州郡用兵調發饋給爾為  
使者循行往來按視良苦升榮禁闥就總戎鈴勉圖茂  
勲思對優寵

前廣信軍司理參軍王塾可衛尉寺丞制

勅某官某國家邊陲之事必以兵師申其威武然儲峙  
食要務於流行使者以爾勤力收斂補於漕輓升榮京

家圖厥勞効勉勵爾志以答恩渥

李宗儒可內殿承制制

勅具官某爾以武材往洹邊堡種落懷附斥堠甚明眷  
言帥臣遠形需奏特升聯於殿陛俾耀寵於塞垣勿忘  
欽承勉立來効

葉均可大理寺丞制

具官某官賞之法所以磨勵世俗旌拔賢材然有勞而  
陟與累日而得者差異也爾治劇務復積歲功於格應



遷命丞理寺勉脩成業以稱寵靈

齊州司法叅軍監秦州在城酒司馬京可衛尉

寺丞制

專筦利資以佐公上必用廉飭乃有羨贏計課應遷京  
曹是踐勉尚脩勵祇荷恩褒

陝西轉運使范祥追官知州制

勅具官某爾為使者權涖冀門建言羌酋願上土壤國  
家不贏尺地之得尚安遠人之歸再屬經圖務存久靜

爾深陳便利堅請完修但知開劃之勤殊失預備之策致茲寇盜乘隙鈔攘興戎之端厥咎誰執奪去一秩典臨外州實為寬務勿忘循省

右龍武軍大將軍克棟可右衛大將軍制

勅帝者宗屬惟是飭愿自守其履尚固可嘉矣況乎潛心經術發揮詞業不有恩數之厚曷以勸示來者具官某植性端靖頗務詞學屢形章牘願較藝文給試禁署預列名等特遷環衛之重以躋稽古之効益思為善以

對光寵

供備庫副使李評可朝散大夫殿中丞祕書丞  
宋敏脩可太常博士守監簿楊慥可太祝奉禮

郎制

逐人學士試到  
奉聖旨與轉官

勅具官某等天下以文治而士人以詞進者為日舊矣  
惟爾評生於貴戚早聞善訓綴學屬文特然有立敏修  
暨慥世以儒聞能名其家經術益茂命試列等粲然可  
觀或遷殿省之聯或舉奉常之列率為恩渥勉務敦脩

皇姪故左武衛大將軍常州團練使宗道可贈  
觀察使追封侯制

勅惇睦至親故事之重褒顯令德治道之先矧惟宗藩  
之亡宜有哀禔之賁具官某知為善之樂篤好學之心  
棣附承上以光華麟定應時而信厚久司環列之重遙  
總州兵之雄天奪厥齡予深其悼命以觀風之重徹茲  
書社之榮冀汝營靈歆此恩寵

西京左藏庫副使帶御罷甘昭吉可特授文思

副使制

勅具官某性質溫茂材資幹明久叅省戶之嚴仍寄帳  
兵之信服勞益謹第課應遷優陟使聯用推朝渥勉敦  
爾志以永厥成

狄青奏平變賊有陣前陣內使喚得力人都官  
員外郎鄭紆可職方員外郎右贊善大夫馮炳  
可授殿中丞制

勅具官某等向以狂獠肆毒嶺嶠之南臨遣帥臣往殄

頑兇爾等皆以材敏實從征行還上功次之條宜有遷  
褒之澤序升郎位擢與省丞並為恩榮勉務修飭

監簿余仲荀可太常寺太祝制

勅具官某等向遣樞臣平定戎寇還上功狀之實未紀  
驅馳之勞爾等咸以材能嘗與軍事或進祕丘之列或  
升禮寺之華勉圖進修以對光寵

入內東頭供奉官梁惟一可大將軍致仕制

勅具官某天資粹謹材幹敏明久叅宸內之聯比嘗任

使之劇日親藥劑屢易歲華備陳懇實之詞願解信要之職擢於環尹俾遂家居終始之榮汝其至矣

大理寺丞知梅州許士廉可特授太子中舍依  
舊知梅州制

勅具官某等百粵之壤風土異宜爾分守符實處嶠外積勞累歲具于有司最要之凡合於遷格進陪宮案仍  
涖方州祗荷寵榮勿忘省飭

皇后妹仲翹新婦宜特封鉅鹿郡君制

勅樞躔紀節茲乃慶辰綸渙推恩厥惟典舊矧乃后宮  
之戚宜推湯賦之華某挺生慶門早服柔範動靜鑒於  
圖史夙夜謹於絃綖嬪于宗英著厥閨則宜徹郡田之  
號益峻封君之榮思楫懿恭用欽寵數

貴妃妹宜特封清河郡君制

誕慶講辰睦姻疏寵眷惟妃位之重願推女弟之恩舊  
典具存明命斯允某生高華之族稟茂淑之姿從姆教  
而甚嚴奉閨儀而愈慎親為外戚陪嘉節之祝延地啟



名邦峻封君之等數宜思優渥益荷顯榮

供備庫副使王用可西京左藏庫副使內殿崇

班張玉可內殿承制制

勅具官某等前遣專師平定狂獠還列功次第推恩賞  
近因振旅引對便坐陣行分合而中法士卒擊刺而奮  
勇再遷使秩式承制旨竝為旌寵宜楙忠力

前兩府并兩制聖節奏弟姪京官或試監簿制  
慶誕之節公卿在位忤呼稱壽罔不和悅朕嘉與近侍

共樂無疆恩于而家用為榮寵命爾京秩漸于官政力  
圖德業毋懈夙夜

宰相叅政樞密聖節奏薦子孫各京官制

近以誕慶佳節惟一仁弼輔之臣奉觴以上千萬歲壽  
誠懇精至詩不云乎無德不報乃以保任之法除子孫  
官列于京司所以彰朕之意而登爾於士也可不楸哉  
樞密院令史武世長于可久並內殿承制制

爾等陪屬宥府幹敏著稱從征南方復主符籍以謹密

歲年之舊加驅馳戎馬之勞積是最成宜推渥澤升聯  
殿陞傳奉旨辭甄獎之華往服于命

封州司理叅軍林詢被蠻賊殺害贈大理寺丞  
制

頃者盜起南服震驚朕衆汝掾州郡遭罹非命盡忠隕  
首誠節可尚讞刑之秩用賁幽宥

贈太尉追封永嘉郡王允迪長女左侍禁錢隆  
積妻可特封郡君制

慶毓嘉節率均恩渥矧惟宗藩之逝藐焉息女之愛形于薦引當列封號徹名邦之華壤厚敦族之懿典褒與之重爾宜欽奉

東頭供奉官唐中和可內殿崇班制

勅具官某蜀險而遠欲以知風謠情狀者必擇明曉事機之人乘驛往來以通上下之意奔走三載厥惟勞止此其還歸宜有叙進殿墀之峻朝紱之重爾宜勉力以報優獎

樞密使檢校太傅戶部侍郎高若訥可尚書左  
丞充觀文殿學士兼翰林侍讀學士同羣牧制

置使制

予觀前世君臣之際進退以禮始終以義者厥惟鮮乎  
故予於左右承弼之人尤其慎者其有竭忠淳以謀大  
體者必度材器而任之均休勞以避要途者必增名數  
以寵之所以教其君臣禮義之至者也具官某志尚沈  
靜才邵問敏博學窮遠古之遠精義達萬幾之微進以

儒術居然國器寘於諫垣則有獻替之論列於延閣則有顧問之辨嘗更外劇旋長臺憲敷納惟允聞望彌著入叅宰度遂正樞庭幄中之謀處而必中堂上之畫知無不為屢陳懇悃之言固辭宥密之重若乃總文昌之要增祕殿之職日與金華之議兼涖天閑之政併是優寵所以示朕之眷賴而彰爾之謙退其往踐之尚體茲意

端明集卷十一

欽定四庫全書

端明集卷十二

宋 蔡襄 撰

制誥

樞密直學士給事中孫沔可樞密副使制

朕惟上承宗社之天下撫人民之衆其出命令治綱紀者維一二輔弼之臣而已所以夙夜思慮敷求俊賢矧茲宥密之嚴專治兵夷之劇苟明不足以知王體材不

足以辦吾事者其可用之耶具官某以文業進身而能果自任智略如車輻之湊論議若泉源之流嘗居諫垣號為鯁亮逮叅延閣屢更罷使頃年羌戎懷貳邊疆多故將漕關中有輔流之術鎮臨塞下有威懷之稱班旋于外夷曠一心近以峒獠肆狂嶺服騷動寇勢莫遏民愁不聊特輟冀門之行往當邕管之事果無策謀之勝仍親行陣之危天威一伸兇醜大潰比旋師旅願謝官榮蓋寵故鄉之歸命治全吳之重蔽自朕志懷貳樞庭



擇材任官時議惟允噫萬兵之衆在乎區處四夷之遠在乎撫定爾其深惟眷賴益勵忠力交修不及輔成大務將朕有知人之明而爾有濟時之美可不勉哉

利州路轉運使解賓王男遵範可授試祕書省

校書郎制

勅男某以爾父輟自計府將漕于外引援恩典推延子姓名命試祕丘之秩用為使者之寵益務修飭以對褒渥濟州防禦使并代管內部署王仁旭可起復雲

麾將軍依前濟州防禦使差遣依舊制

勅三年之喪不從政所以明子道之本金革之事卒哭而不避所以著臣節之大故恩以伸愛義以奪情禮有從權蓋不獲已而為之也具官某世風紹於前人武略長於馭衆處方郡扞防之重屬邊圉總護之雄屯萃肅齊候鄣嚴靖奄罹家禍求解兵麾念門內之治則必志難從過塞下之虞則匪材弗克宜節棘樂之戚勉循墨衰之行苟忠尚之不忘亦孝誠之已著體茲眷賴往服

訓言

著作佐郎知秀州嘉興縣蔡準可祕書丞差遣  
依舊制

勅具官某三歲一考吏治績狀有材廉之稱無失繆之  
舉者從而遷之所以勗勵來者以爾業文中科佐著作  
局歷官清白嘉有能最即丞舊省仍蒞大邑勉隆政迹  
以荷褒寵

前光化軍乾德縣令國子監說書吳幾復可大

理寺丞制

庠序之設所以起風化而養賢材也其於訓導講說尤難其人故業官遷秩差異常等以爾幾復善談經術甫更再歲薦任交上當夫陟典與名理官蓋寵優次勉懷儒尚用荷邦榮

供備副使張玉盧政可並特授供備庫副使制具官某等自二廣平定以來完修城郭增繕器械屯宿兵防保障邊圉以爾等材武沈毅志尚驍果即正使聯

之重往泣軍鈴之政務存遠略以靖遐服寵渥之數宜  
勉成效

隰州石樓縣令齊惲可著作郎充大理寺詳斷  
官制

勅具官某國家興定百年事為之制四方守吏一法為  
治中都官寺刑書所聚持平處議當表天下爾以材資  
久被薦引叅試具獄咸中準程遷榮祕丘仍居理獄文  
同而比異令具而犯輕勉是審詳以副欽恤

開封府法曹叅軍張友賢可大理寺丞依舊知  
法曹叅軍公事制

向繇銓選作掾京府周歲飭職議法平直薦任交上比  
援遷格升名猷理之秩仍處屬曹之列益思勤蓋以答  
甄獎

試祕校知秦州隴城縣監環州折博務楊京可  
著作佐郎制

勅具官某邊陲互市之局不唯寵利以助資費蓋於輕

重務得其要爾居是官既亦三載收括餘羨第在遷賞  
祕省清秩用為疇勞愈虔乃心勉尚修立

選人授錄事叅軍監茶場制

勅具官某等摘山之利歲資支計其數百萬然而涖局  
者因循至有貨居而不行滯留月久有司請寬資限博  
取材幹以辦其事銓選爾曹以塞朝旨進以州掾之秩  
往臨管權之務勉尚廉敏賞豈吝哉

太廟齊郎勾勉可將仕郎試祕書省校書郎知

嘉州夾江縣監果州商稅制

勅具官某以資入官未更職任而能果勇自力捕除寇盜比拔遷格宜被甄獎試僚京秩序次縣章仍臨征筦之繁益楸廉能之最

太子中舍于壽京東轉運司差勘青州臨朐縣令張師尹進狀冤枉其于壽奏案中入聞詞譏詆朝政制

具官某以明經中選治邑効官承監司之符文鞠部令



之冤訴證逮在遠時月其延輒恣譚詞編著具獄始攬  
奏牘嗟其易心及茲問狀之來彌見得情之實寘于法  
議宜在嚴科屏之仕途用懲狃妄尚念前王之德或恕  
狂夫之言止降宮逢之聯尚臨征筦之局體于寬大益  
自修省

奏舉人前權蔡州觀察副使張仲卿可大理寺  
丞奏舉人前權河中府觀察判官楊愈可太子  
中允制

勅具官某吏繇銓筦而進者皆先以牋閱達于予聽慮夫一士周旋申覆然後處其進退便坐呼引視按材品乃決其事凡脫州縣之職登京師之列如是之難爾其日思茂恩益修業履

左領軍衛大將軍宗績新婦楊氏等三人可並封郡君右千牛衛將軍仲諭等新婦一十人可並封縣君制

淑惠秉心柔明遵禮挺生華族嬪偶宗英益修婦道之

嚴式表閨儀之重屬茲誕慶舉于太宗特推疏邑之封  
用獎宜家之美勉終賢範茂對朝恩

澶州通判國子博士孫奕川到芟草四百萬轉  
運使乞酬獎與轉官知通利軍制

勅某官書曰德懋懋官功懋懋賞今之勳勞以官誠與  
古異然有勞而遷於計歲月而例循資級者尚有勸焉  
以爾向為監郡瀕於大河割聚健薪餘四百萬陞與郎  
位典刺軍壘

奏舉人儀州軍事推官監楚州排司張唐民可  
著作佐郎奏舉人前權知榮州軍事推官張暹  
龍可大理寺丞制

勅具官某等凡職于州縣者去朝廷遠甚故責之上官  
以設保任之科關於銓筦以修功實之最審察能否而  
後遷焉者歲餘百人不為不多然漸而罷使益難其才  
以爾文藻溫瞻吏資敏明陞與京曹用勸能者益圖績  
効以稱予擇才之意

大理寺丞文恭祖可右贊善大夫制

勅某官以爾父嘗秉政鈞出臨方面藉其才智往于邊陲眷嗣子之克家叅京曹之著位寵陞儲家仍易新章惟示隆恩用光慶閥楫修業履益紹顯榮

供備庫使紀德轉儀鸞使左邊任使制

勅具官某向以夷獠弄兵邊圉被寇躬率士伍力當戰鋒雖翦逐於凶渠亦彫隕其嗣子眷言才勇宜被恩榮遷進使聯用酬功最勉圖來效毋怠忠勤

皇城副使田武可特授儀鸞使制

勅具官某選自材

闕

往監軍治練習邊疆之事通知士

伍之情春惟帥臣屢形奏牘任其幹辦許以精勤特遷

幄

闕

之聯仍處兵戎之務勉圖忠効用答寵靈

故祕書監胡旦特贈工部侍郎制

勅治道出於人文惟儒者為能通而行之故世主右賢  
以風天下國家發揮神化招徠樸茂挾經術拔詞章者  
脫巖野而都鄉相生享顯榮歿有祿贈可謂重矣具官

某該貫百氏之言而藻思雄贍首中科選旋升禁掖以  
材自名聲蓋人上秋逸之驥蹏蹶中路晚以病退署書  
見世今聞嗣續彫落旅魂未安已敕守臣給辦喪事仍  
以文昌貳卿申賁泉壤嗟爾不泯其少慰哉

左藏庫副使錢師回可特授皇城副使制

勅具官某材幹敏劬智略精明典符方州總兵江峽民  
俗安靖疆陲協寧逮茲還朝仍列禁省迹其功閥之最  
陟于城雉之聯益尚清修勉立來効

尚書工部郎中充天章閣待制呂公弼可依前  
工部郎中充龍圖閣直學士高陽關路都部署

兼安撫使兼知瀛州制

國家都汴而燕趙之郊制控北道河間尤為要地今雖  
邊圉晏清然於遠馭之策屯敢勇之士蓄犀利之器以  
為蔽扞委之儒將苟非智略通敏燭見事機疇可以任  
具官某出於相門挺然有立持身遠於權利從政達於  
治經踐歷滋深風稱甚美頃以遣臨河朔之重遂升正



閣之華省徭以集散亾流粟以資支計列城謹於備禦  
吏部悚於嚴明逮茲罷還聞嘗諮訪遷河圖之近綴總  
帥幕於故關風俗所安兵民所賴皆爾周悉豈煩訓言  
尚書禮部侍郎充集賢院學士吳育可復資政  
殿學士兼翰林侍讀學士知陝州制

勅近侍之臣嘗更二府以叅國論有補於時者朕每念  
之不忘于心具官某文業深厚顯於當世才劬端敏貳  
于幾政進謀獻道蔚為巖廟之器宣仁流化屢更屏翰

之職向者甫畢家難俾處經筵庶乎諮詢日聞讜議處  
刑剡奏願就宴閒遂兼麗正之名仍蒞憲臺之重悉還  
舊秩分治要藩抑予爾思勿憚煩於事任

前守陵州并研縣令姚吉甫可除授山南東道  
節度推官知廣州清遠縣事制

勅具官某頃以薦任分宰邑封爰滿歲成復從銓調奉  
賓游於幕府宣上化於吾人勉治政經庶光朝寵

邵州錄事參軍監成德軍倉場給納宋航可宣

奉郎行廣濟軍錄事叅軍監鄆州竹家渡制

勅具官某近監司具章以爾資材罷輟年力衰暮庾氏之職亦莫能集尚念服勞之久更臨濟涉之務益自奮勵無或空曠

福州閩縣尉李士隆獲賊授濟州任城尉與萬戶請授制

勅具官某尉能除盜時乃修官格有敘勞茲用推賞勿居近邑增昇奉泉勉圖飭職之勤益荷懋功之美

奏舉人前汀州上杭縣令陳世京奏舉人前同  
州支使孫有孚奏舉人前真州軍事推官石瑛  
可並著作佐郎制

勅具官某早藉吏資遠宣邑治惟士風之尤異彌歲月  
以甚勤契傳銓程當正遷格宜與蘭臺之集用欽綸渙  
之華益務惇修毋忝褒命

故太子少師致仕贈太子太師任中師外甥江  
景倫可試監簿制

勅具官某以爾外舅嘗貳機衡休有善狀唯其子姓克荷家聲緝綴遺文薦于乙覽追思德舊恤及親聯列於工監之名表乃朝恩之渥

刑部法直官前台州仙居縣尉兼主簿錢公紀  
可大理寺丞充刑部檢法官制

勅具官某天下所以正明之失者共三尺法耳而秋官考讞尤為四方所則其屬官非有敏明之資固克勝任以爾文華中選兼著吏稱覆閱科典既亦洊歲就遷京

寺仍處舊治益飭厥職勿懈乃心

奏舉人歸州巴東縣令都宗范奏舉人永康軍

錄事叅軍皇甫望可並特授大理丞制

勅具官某京司之官職任皆要與其名列必有材選今  
雖兼授於外然銓管而進詳擇尤重以爾等或班教條  
於縣道或正綱紀於郡部咸有勤稱中于遷格往丞廷  
尉恩渥甚茂爾宜飭勵毋或少懈

奏舉人前鼎州龍陽縣令明哀奏舉人前權成

德軍節度推官楊崧可並特授大理寺丞制

勅具官某出於儒族久贊賓等居多保任之文休有閔  
閱之最吏資兼敏銓覈中程陟京寺以開榮眷朝恩而  
甚茂勉修身檢益邵世風

翰林學士兼龍圖閣學士給事中權三司使田  
況可禮部侍郎充三司使制

勅郊廟之禮官師之稟內以贍萬旅外以通四夷經入  
貨費歲鉅萬億予有近列試總大計推本儒術辦益邦

賦即拜真命僉言茲允具官某文業華敏屢中科選經  
誼精博蚤奉策對踐歷諫署規箴有直亮之節延登詞  
禁策訓有深厚之體周旋清密卓爾端勁懷綏藩圉蔚  
然材略向繇全蜀還司會府孚予仁心而括可久之利  
周國支用而削無名之斂迹其風稱朕甚嘉焉遷正使  
名序進官扶屬委彌重汝無憚煩

東頭供奉官李澄可內殿崇班制

勅具官某才兼武幹名列禁嚴案最要於攸司宜進遷



於厥秩往聯文陛特視通閨毋替夙夜之勤以對寵靈之茂

勒停人左侍禁王利涉除率府副率制

勅具官某列職禁墀護兵邊圉比因朝譴願謝任途尚軫哀遲久備驅使往貳官坊之率猶兼秉奉之資歸安汝躬厥恩甚茂

試將佐監主簿張塤可守將作監主簿制

勅張奎孫某惟乃祖修身泣官清白恭畏屢更寄委勿

憚勤勞奄爾淪亡念其子姓即正舊秩往服恩茂

按撫司奏昭州保明表胄准赦書特與恩澤授  
試將作監主簿不理選限本州教授制

勅表胄向有恩旨嶺嶠之外歷訪遺材今爾守臣與使  
本道者以爾伏膺典墳不求仕進願加寵命用勸遐俗  
往試名於京秩乃闡教於州庠欽服甄掄益勵誠節

戶部侍郎知鄆州龐籍可觀文殿大學士制

勅孟軻有言君之視臣如手足臣之視君如腹心蓋云

君臣一體而相須爾朕於大臣其在朝廷則覆護其所  
為出而居外則念思厥勞恩數之行莫不發於予衷也  
具官某素以材略弼成大政周旋二府遂冠台閣迺者  
宵人冒欺詔正厥獄猶以剋躬避闕二席鎮撫東服曾  
未朞月朕懷汝能寵以禁殿之職爾雖身在藩屏而心  
實在於左右噫永謨明欽哉茲命

龍圖閣學士尚書刑部郎中知徐州呂公綽可

復翰林侍讀學士制

勅夫一法以正羣下有抵必行示不私也人主敦仁以  
覆萬物雖遠必及示有恩也惟是二柄予嘗念焉具官  
某蚤以材劬久歷詞禁向尹京邑甫暮歲律中有詔獄  
失於情審退處淵圖之職往試藩服之政朕於近侍眷  
念不忘金華勸學悉還爾舊爾其省修以被予之後寵  
河北轉運使陳旭授天章閣待制充都轉運使

制

勅國家以大河之北實為藩蔽將漕大計每擇近侍以

都總之委寄尤重非通明幹正之材不可以任具官某  
頃居諫列振厥職能言議忠果不避權要瘵以延閣之  
秩試之使領之劇而屢形奏牘力辭寵渥比臨所部甫  
暮歲稔念汝誠節申錫寵命尚體朕意益邵風力

起復雲麾將軍宣州管内觀察使侍衛親軍步  
軍副都指揮使范恪可銀青光祿大夫餘並依  
舊制

勅在親喪者惟金革之事則起之而於官號亦有異數

當其外除則復其職抑舊典也具官某志尚沈確材武  
優毅頃臨邊圉休有風稱入總環衛彌見誠効自罹家  
難尚兼帥領甫終禮制之節宜被散文之秩勉思忠盡  
以報恩寵

光祿少卿知滑州呂士龍可少府監差遣依舊  
制

勅國家憲述前古以馭百工虞書之考績周官之大比  
參稽厥中著升降之資以勵材者爾以罷幹常敏久更

任使序進亞卿之列四暮歲歷之久舉無愆失稱有謹  
厚典領三尚均秩九列寵數甚峻汝往踐之益邵忠勤  
毋替爾守

如京使會州刺史帶御器械曹偕可遙郡團練  
使落御帶制

勅具官某惟爾世家有忠王室清毅之訓彌遠而在爾  
以材幹侍于軒闈久居內史之職兼持武帳之械動靜  
沈謹志慮端恪扈從左右屢更年稔進叅團結之任尚

仍禁密之秩益宣節教庸紹風美

太常博士直史館知光化軍楊畋可屯田員外郎依前直史館知邠州制

勅迺者南方有干紀之民命師往征屬久治平士不知戰以爾秉心孤直禮為身檢荆蠻騷擾亦嘗殄平起於喪廬往為帥領厥功未就言者其興退守奉常典涖軍壘念汝忠藎屈處安恬進復郎曹易守邊郡

國子博士呂邁可虞部員外郎制



關四  
字

撫有疆宇窮制坤輿海南之邦悉歸

關六  
字

蒞瓊莞

善敷條教編戶胥樂屬峒無擾

關五  
字

秩用疇守土之勤

勉務清修以稱褒寵

大理寺丞田瑋可特授太子中舍制

勅具官某天資忠順嚮慕風化任以仕藉列于京寺

關三

字

日傳契遷典宮儲近屬寵命惟渥勉力修飭勿怠而

志

端明集卷十二

欽定四庫全書

端明集卷十三

宋 蔡襄 撰

制誥

晉州霍邑縣令孫固可大理寺法直官制

勅廷尉主大平天下法令而丞史之屬必擇常通無害  
者任之爾以文詞中科練知吏理驗試具獄甫更洊月  
丞于本寺用伸所能惟矜而明乃飭厥職

故東頭供奉官閤門祗候王從政妻郭氏可縣

君制

勅以爾夫向與兵戎追遏蠻寇橫罹擣刺嘗已寢甄尚  
念丘嫂之孤久纏晝哭之戚徹茲縣壤俾列封君存沒  
淪恩務恤良厚

開封府左軍巡判官劉機可光祿寺丞制

勅具官某京邑惟建左右獄以治萬衆之訟尸其官者  
晝夜訊問審辦能無滯擊斯亦勞矣以爾向繇銓調擇

司其職僅踰暮歲終無回枉即遷京寺尚仍舊治悉心  
矜慎無或少怠

前泰州泰興縣令充故隴西郡王宅教授陳之  
奇可太子中允致仕制

勅具官某修飭行業有鄉黨之稱精明經術有訓導

關三

字

自銓筦勸教舊族齒髮未暮遽還官政進聯

關三

推

朝渥關其祇率服于休命

大理評事知開封府扶溝縣張子瑾可大理寺

丞制

勅具官某等朕念勞而不錄則材者懈過而均進則愿者弛三年一比擢升能効其亦幾乎治矣爾等列于周行久宣風力考闕遷級庸示甄獎爾其勉飭往荷褒渥都官員外郎呂公著可司封員外郎依前崇文院檢討制

勅具官某生於相門不忤華習潛心道義飭勵誠節入遊文館彌見冲抱以三年大比之法而進爾資級勉修

職業用永來譽

大理寺丞梁彥回可特授殿中丞制

勅具官某爾以文詞選於科等以材美服於王官積歲  
最以居多疎風稱而甚遠序進通閨之籍參陪中省之  
聯茂業益修來譽彌邵

故衛尉卿致仕張從革親孫嗣宗可試將作監  
主簿制

勅故具官某孫惟乃祖父服仕塗馴至卿列謝還政事

欽定四庫全書

瑞明集  
卷十三

三

休老家庭比間終命之期宜需錄孤之澤開榮工監朝  
渥其承

西頭供奉官曹旼可內殿崇班制

勅具官某世家忠勲列在盟府河洲德美重冠坤儀屬  
誕節之祝延援典章而來請躡進爾秩序通于朝日陪  
軒陛之聯益顯紳裳之緒

前絳州防禦推官監晉州折博礮務徐師旦可  
大理寺丞制



勅具官某漢設六筦以籠天下之利後世因之極夫纖  
悉弛之則支計乏用屈之則侵牟患作惟於擇官濟務  
而不撓斯為得矣爾以保薦專於筦利較程資代宜有  
甄賞參丞理議厥惟茂澤汝其勗哉

故追冊溫成皇后弟姪授官制

勅具官某朕以妃掖之貴奄爾薨逝追崇命號特進異  
禮眷其族姻之大咸有肺腑之近錄親遷秩用慰存歿  
以爾等聯榮外戚列官京師或峻秩於奉常或參丞於

省寺恩澤渥茂勿忘欽承

陝府西轉運使金部郎中李彥可司封充淮南  
等路發運使制

勅具官某舊居關中歲輸山東之粟至貳百萬號為稱  
職國家據汴都之會觀方來之要挽運儲廩出于江淮  
以萬計者率嘗六百故其使任尤慎擇焉以爾志尚忠  
果材通世務屢更煩劇隨著風稱經營秦陝之重克効  
邊障之實東南將漕僉惟汝能進列清曹總賦六路然

周宣恩仁則邦計或屈一切辦事則民窮無聊勉思悉  
中毋重予念

西京左藏庫使張從一復西上閤門副使制

勅具官某省戶之嚴使介之近自非端良其志尚詳練  
於典儀曾莫得瞻展闔之光觀班朝之範以爾蚤登仕  
路祇服官勤貳職文闡紹休先世比緣旁累嘗與下遷  
逮禋事之甫成需恩華之胥浹敘還曩秩往荷新榮

內殿崇班謝禹珪可內殿承制東頭供奉宮閣

門祇候王成一可內殿崇班依舊閣門祇候制

察院劄子為汴口水勢  
調善奉聖旨各轉一資

勅某官汴建廟社夫衆所居支疏河流東入淮泗歲漕  
南方凡六百萬贏縮之計實惟茲水爾等職在渠洫醜  
閑得宜克羨歲儲時乃之力進遷資等疇叙勤績益邵  
來最以稱甄獎

內侍省內東頭供奉官任修已可內殿崇班制  
勅具官某參職官省祇事禁近更與罷使寢積年歷嚮

惟內府條上勤庸念其材敏之資濟以恪恭之志遷聯  
朝著益茂邦榮勉尚忠勞毋懈而守

閣門承授文林郎守右金吾衛長史劉慶李日  
新王昭序可竝特授守中書省主事依前充職  
散官如故制

勅具官某祇事宸闈寢延歲筦朝廷之文而最為知練  
蚤夜之職而居尚勤廉迺者裡慶敷行恩華均被遷名  
禁省漸歷榮途益務勤修勿忘恭謹

東頭供奉官王官寧可內殿崇班制

勅具官某服勤官次寢積年庸屬修最之來聞宜疏恩而下逮進列殿聯之近視榮朝家之優祇受褒甄益尚清飭

禮賓使英州刺史劉文潤可洛苑使制

勅具官某事朕軒闥秉心恭肅服官邊圉馭下嚴整向繇隴外蔚有善稱遷使領之近聯總兵鈴於西道汝有學術必理要通知汝有材能必事機敏達守之以靜濟

之以和惟其忠勤無重訓辭

特勒停人前奉直郎守大理寺丞陳佩可守衛

尉寺丞制

勅具官某士之以過罹于文者雖在斥棄既開其申辨之路以盡其情加之寬大之澤以修其用可謂至矣以爾頃治大邑旁觸私累已更郊霈漸復京司往省于中勉樹乃績

追官人前承務郎守司天監主簿解文質可司

天監靈臺郎制

勅具官某被累免官歷更歲律屬此禋祀之澤釋其錮  
斥之文降錄舊資還齒仕籍益循檢押無蹈悔尤

尚書刑部郎中天章閣待制張昱之可光祿卿  
致仕制

勅朕於羣臣進退之際曷嘗不緬然思之方其強仕發  
智能以濟務則有官賞以楙其材逮其謝歸養志意以  
自扶則有恩渥以寵其行仕宦者豈不懽然得其所耶



具官某立節清峻無緇磷之苟臨事明敏有執導之利恤民以惠屏姦以嚴循吏之風聞于當世自升禁近之列屢委宣藩之重服老耄之言而知止躡疏廣之跡而告老爾其還上官事秩以列卿休于而家尚體朕意

皇姪故左監門衛將軍宗邈宗沔宗沔可贈防禦使追封侯制

勅朕觀葛藟之詩得其親親之意王者必厚恩施以滋九族使之子孫繁茂盛大乃有凋落之戚曷勝予悲具

官某生於豐有而稟信厚之行樂於為善而服義方之訓每自飭勵力期修立降祥遠驗疾起鵲原宿夕之間弟兄繼喪聞訃惻悼輟臨廟朝陞禦兵之榮名治通候之書數瑩識不泯尚承哀祔之典

大理評事方蘋可衛尉寺丞制

勅具官某吏治三載則效其勞最以進資等用廣恩惠爾所蒞局厥貢惟殫而能厲精職業專於嚴奉督察欺獎寬於繇作序進其等時懋爾能

前東上閤門使文州刺史李珣前西京左藏庫  
副使李琪李玘前禮賓副使李域前供備庫副  
使李珣李球可並除舊官制

勅具官某人子之於其親之喪也哀念無窮惟聖人制  
順天時之安祥禪甫終起而從政國家署列武職者率  
繇金革之胄以爾生於舅訓族習禮文居廬三年日月  
逝矣還奉朝請再服官舊兼循忠孝勉自祇飭

尚書工部侍郎知桂州充廣南西路都鈐轄經

略安撫使余靖可依前尚書工部侍郎充集賢  
院學士依舊知桂州充廣南西路都鈐轄經略  
安撫使制

勅麗正天子禮樂之司非近密官不得為其副所以刊  
緝述撰則為邦典顧問應對則謀王體擇選之稱尤其  
難者具官某以文學歷詞禁以材智更使指向者嶠服  
醜類冒抵邦刑起汝於喪廬授之以兵節自臨總制漸  
格小康遽攬於奏封願追行於祥禋眷惟武略方倚

帥才特兼書府之名仍居經管之重勉懋忠力稱朕意  
焉

追官勒停人也田員外郎士建中特授太常博

士制

勅某官某爾以儒學名家自守師說嚮官河汴醺決失  
宜奪去郎曹退居田里今予近侍薦爾才行授以奉常  
之秩蒞夫征筦之局追服故法當有漸焉

服闋人歐陽修可依舊龍圖閣直學士尚書吏

部侍郎制

勅人臣之大節曰忠與敬處之者或過不及故先王設禮以為之制喪者不呼其門盡為子之志也服除而從政即為臣之道也具官某以文章直亮擇居近侍以才略罷幹屢吏劇任自罹家難歸伏閭里今祥禪甫畢賁然斯來文昌清曹淵圖祕職皆爾舊秩往服新命惟是移孝資忠之一義爾其欽哉

文思副使新差權環慶路駐泊兵馬鈐轄張揆

可騏驎副使兼知環州制

勅具官某武略沈雄智謀敦劬擢叅禁密之列陪與使  
介之聯正班著於天閑錄教條於州檄邊防重障朝論  
須材勉思撫鎮之方毋忝甄褒之舉

軍都指揮使諸班都虞候可四廂都指揮使制  
勅予有忠毅之士班于殿巖列于扈衛者咸擇部帥之  
長以明軍師之法而於郊貺率有遷授以爾等材勇出  
衆義烈著稱擢自顏行董齊虎旅或馳聲邊障或累効

天營逮此霈恩兼領諸校褒榮斯至益楸欽祇

廣南轉運使孫抗男适可試祕書省校書郎制  
勅某以爾父久司計漕遠處炎陬頗著夙夜之勤遽聞  
彫落之戚命錄嗣子試僚祕丘益勉省脩克紹家世

步軍副都指揮使宣州管内觀察使范恪可馬  
軍副都指揮使軍節度觀察留後殿前都虞候  
隴西防禦使王凱除步軍副都指揮使  
閩州觀  
察使制



勅在易師爻之義必藉剛中之德以居總正之位邦懷  
衆服乃獲亨吉惟我祖宗武定天下扈拱宸極分屬三  
帥制馭之法猶在耳目節其衣食故約而不匱均其役  
使雖勞而不怨培率之弊息而奮勇之志決今于貔虎  
之士以百萬計擇任將領其可易乎具官恪智略明果  
而資之以沉毅凱識慮精通而濟之以忠貞咸更疆圉  
之任而風稱甚遠久侍軒陛之近而恭畏無懈信委茲  
重迭遷其守以爾恪知兩使之務總萬騎之風以爾凱

一作  
覲

啟乘車之行專伍符之籍爾其承渥命之厚念賢將之業祇服辭訓以稱朕意

龍神衛四廂都指揮果州團練使安俊除捧日

天武四廂都指揮使內藏庫使賀州刺史郝質

除闕州團練使龍神衛四廂都指揮使制

勅國家兵師之權分建三帥而步騎之列咸率其屬以相軍政以伸國威苟非忠勇之材莫與其選具官安俊性資沈遠智謀周達出臨障塞入承扈衛具官郝質精

通武略善御士心屢職戎鈴久著風稱會師員之缺次  
繇部校而迭遷分握虎篆上拱天極恩榮信倚莫是重  
焉

尚書金部員外郎直祕閣范鎮可依前金部員  
外郎直祕閣充開封府推官制

勅具官某爰初筮仕以儒飭身詞章右於衆人聲稱籍  
於天下擢之黌序而訓導尚於經術延之文館而譔述  
精於史體外勢利而自守入名教以為樂惟爾言行蓋

有聞矣都會之府市獄之淵必資敏明乃濟繁浩佐  
厥治用觀汝能

服闋人辛若渝可依前少府監分司南京制

勅通喪之禮稱於人情惟天道之行日月已究起任生  
者之事是臣子之節兼得其中也具官某風力清粹  
尚冲深久踐仕途屢更任使向分留都之治中嬰素韞  
之艱禪纖既除朝著斯復悉還舊秩往服茂恩

洛花使昭州刺史新就差充并代州管内闕步

軍鈐轄馮行已可左藏庫使兼知代州皇城使

新就差充定州路駐泊兵馬鈐轄充保州等處

都巡檢劉凡可遙郡刺史兼知保州制

凡一作凡

勅自兵民之判而為二其治兵民者有心其間不能均  
一豈不異哉故守邊郡者兼得治之唯材能智略之敏  
乃可以授以爾行已挺生相門卓犖有立久居疆圉特  
著風稱以爾凡世家守儒復取科等不殊文武自期功  
名或增禁府之聯或領州符之重提封之大可以為政

屯旅之衆可以訓戎夙夜精勤以稱予意

楊注可試祕書省校書郎充春州軍事推官權

知春州制

勅具官某嶺服之遐風氣尤異雖方州號為出守繇鈴  
筦許其願行寵以賓幄之資委之郡章之重勉尚廉治  
庸稱褒恩

醫人李守文可國子四門助教制

勅某顯志方伎記迹侯家屬誕慶之辰推及下之澤與

陞庠學脫去民編恩榮甚華勉自精飭

西上閤門使新差高陽關路鈐轄馬懷德可雄  
州刺史仍舊西上閤門使兼知雄州引進副使  
新差充益州路鈐轄宋守約可西上閤門使制

勅國家撫臨多方專尚文治而邊圉要重之處莫不分  
戍守邊防外虞唯其命帥鈐戎之二者必得材而後授  
之具官馬懷德性尚沈毅智略通明移控朔陲進領州  
榮具官宋守約忠果著聞恩信及人遣護西兵之雄特

拜右闈之重渥澤皆茂揣稱良難爾其悉力盡公修舉厥職以副謹擇之意

殿中丞王綱可太常博士制

勅某國家馭吏之法三年而遷用為故事以爾綱頃從南軍專持文要比還列賞裁減歲遷監軍全彬以爾有勞形于薦引曲臺之命特為優寵勉楫誠節毋怠而志諫官韓絳轉官修起居注制

勅具官某爾以高第為左右史之官而有端方直亮之



節徹於予聞命居諫列甫暮歲序規箴獻替動臻理要以疾移告懇祈外補朕念敢言竭力之人詎可以遠既以考績之法遷與郎署而又還記言之職日侍嚴近蹇蹇之論尚或相予爾其勉之

入內都知武軍節度觀察留後王守忠弟守規

制

勅具官守規

闕

念昔儲坊唯守忠祇事左右攀附鱗翼

漸于禁近總都內宰久而益恭嬰疾捐世朕甚悼焉閔

舊錄親厥典惟舊爾以材敏叅列軒陛方重天倫之戚擢進使朕之重勉自修率勿懈而志

王守忠男懷玉制

勅守忠長男懷玉等朕在東朝惟守忠祇事左右攀附鱗翼漸于禁近總都內宰久而益恭嬰疾捐世朕甚悼焉閔舊錄親厥典惟舊遷丞殿旨擢進使朕寵數之蕃實厚勤故爾宜修率勿懈而志

王守忠諸婦制

勅守忠男懷誼妻張氏念守忠事予恭勤不怠比聞淪  
謝特深愍悼恩寵其家逮夫諸婦脂田肇賜實啟大邑  
渥命優厚永惟欽承

禮部員外郎兼侍御史知雜事張擇行等可依  
前官充天章閣待制知諫院制

勅帝者之明莫若唐虞尚旌敢諫之士蓋以萬微之務  
必得端亮以修不逮肆予臨御注意諍臣而於授受之  
間特慎其選具官某資性敦厚行履清勁臺端繩糾卓

然風采具官鱗贊敏識周通素尚方正箴規政治不回  
要路並進雲章之職參居規地之密勿替而守以稱朕  
意

乜田員外郎充殿中侍御史裏行余希孟可殿  
中侍御史充言事臺官制

勅具官憲臺之職彈治百官分決詔獄昔我真考特置  
言事御史顯持諍議所以甄錄才美嚮爾陪列殿內知  
無不為序進官聯益推渥澤噫敢言非難中理惟難勉

楸乃誠服我休命

觀文殿大學士戶部尚書知許州宋庠男椿年

可守將作監主簿制

勅某誕慶之節中外臣辟抃呼稱壽罔不和說朕嘉與  
舊德共樂無疆恩于而家用為榮寵命爾京稱漸于官  
政力圖德業毋懈夙夜

衝替人前益州司法叅軍胡永錫可霸州錄事

叅軍監淄州鹽稅制

勅具官某郡督郵之任蓋所以紀綱政治糾司過忒惟  
強明幹敏者乃為之以汝嘗歷諸曹復更罷免具以都  
掾之目洎于征權之局夙夜思慎毋空厥官


劉元瑜奏醫人孫士龍試國子四門助教制

勅某挾方伎之學遊近侍之門言達予聞命試爾秩脫  
迹民版足為光榮

歸明人等詞

勅某等鷙猛之材久雄於種落忠順之志願圖於聲明

特推朝渥之榮以示邊防之寵勉圖報効勿忘欽承



端明集卷十三